

# Акафист Духу Святому

## ***Кондак 1***

Приидите, вернии, Духа Святаго прославим сошествие. Иже от Отеческих недр на Апостоли излився, яко водами, боговедением покры землю, и живоносная благодати богоусыновления, и горняя славы сподобляет чисте притекающих к Нему, освящает же и обожает зовущих:

**Прииди, Утешителю Душе Святой, и вселися в ны!**

## ***Икос 1***

Ангели на небеси светлыми лики Духу Святому немолчно славу воспевают, яко Источнику жизни и Свету невещественному. С ними же и мы прославляем Тя, Душе непостижимый, за вся явныя и тайныя милости Твоя, и смиренно просим блаженнаго осенения Твоего:

Прииди, Свете истинный и Радосте духовная; прииди, росоносный Облаче и Красото неизреченная. Прииди, и прими яко курение благовонное хвалу нашу; прииди, и даждь нам вкусити радость изливания Твоего. Прииди, и возвесели ны обилием даров Твоих. Прииди, вечное солнце незаходимое, и обитель в нас сотвори.

**Прииди, Утешителю Душе Святой, и вселися в ны!**

## ***Кондак 2***

Видом огненных язык, во свете и дыхании бурном и радостотворном, сниде Дух Святой на Апостолы. Тем же пламенем Его объаты бывше, рыбаи мир весь в Церковь Христову призваша. Беды на суше и на водах радостно терпяще, лютыхсмертей не убояшася. И во всю землю изыде вещание богокрасныя песни их: **Аллилуиа!**

## ***Икос 2***

Чаше дождеродная и огнеточивая, излившаяся на Апостолы в горнице Сионстей: Тебе поем, Тебе благословим, Тебе благодарим, Боже Душе Святой:

Прииди, Освятителю и Хранителю Церкви. Прииди и даждь едино сердце и едину душу верным Твоим. Прииди, и воспламени наше хладное и бесплодное благочестие. Прииди и разжени огустевающий над землею мрак безбожия и нечестия. Прииди и веди всех на путь праведныя жизни. Прииди и настави нас на всяку истину. Прииди, Мудросте непостижимая и ими же веси судьбами спаси нас.

**Прииди, Утешителю Душе Святой, и вселися в ны!**

## ***Кондак. 3***

Тайна глубочайшая! Боже Душе непостижиме, со Отцем и Словом Создателю всех! Ты украсил еси горния чины Ангелов во храме неприступнаго света! Ты воззвал еси к бытию лики огненных светил с великолепием славы. Ты плоть и дух в чудное единство согласуя, сотворил еси род человеческий. Тем же всякое дыхание поет Тебе хвалу: **Аллилуиа!**

### ***Икос 3***

Альфа и Омега, Начало и Конец, Ты Душе вечный, необъятною силою парения над водами, и страшным кругообстоянием оживотворил еси всех и вся: от живоноснаго дыхания Твоего из безвидныя бездны возсияла есть неизреченная красота первозданнаго мира. Сего ради взываем Ти:

Прииди к нам, Премудрый Художниче мира. Прииди, Великий и в малом цветке, и в небесной звезде. Прииди, Многообразие неизреченное и Красото вечная. Прииди и озари мрачный хаос души моея. Прииди и яви нас новою тварию во Христе.

**Прииди, Утешителю Душе Святой, и вселися в ны!**

### ***Кондак 4***

Непостижимый и всеблагий Душе, освящения Источниче ! Ты одеял еси Пречистую Деву Марию в ослепительный и неприступный блеск Твоего Божества, соделав Ю Матерь Бога Слова, Царицу Ангелов, спасением людей. Силою премирною Ты осеняеши пророки и Апостолы. Ты возносиши их до третьяго небесе. Ты уязвлявши их сердца красотою небесною, влагая в их речи пламенное стремление, влекущее людей к Богу. Ты обращаеши последних грешников, и они, полные горячаго восторга поют: **Аллилуиа!**

## ***Икос 4***

Святым Духом всяка душа живится, Его силою возстановятся к общению воскресения вся создания в последний час нынешняго века, и в первый будущаго. Тогда воздвигни нас, Утешителю Благий, из гробов наших не к осуждению, но к богосветлому блаженству со всеми святыми, близкими и сродными нам!

Прииди же, и избави нас от смерти духовныя. Прииди и пред кончиною нашею насыти нас Телом и Кровию Спаса Христа. Прииди, и даждь нам успение тихое с чистою совестью. Прииди и сотвори светлым наше пробуждение от смертного сна. Прииди, и сподоби нас узрети с радостию утро вечности. Прииди и сотвори ны сыны нетления. Прииди, и яко солнце, просвети тогда безсмертная тела наша.

**Прииди, Утешителю Душе Святой, и вселися в ны!**

## ***Кондак 5***

Услышав глас Твой: «Аще кто жаждет, да грядет ко Мне и да пиет», молим Тя, Сыне Божий, утоли нашу жажду духовныя жизни, даждь нам воду живую. Излей нам струю благодати от срасленнаго Ти Духа Святаго, да не возжаждем во веки, с умилением поюще: **Аллилуиа!**

## **Икос 5**

Нетленный и Несотворенный, вечный и щедрый Душе, праведных Хранителю и грешных очищение. Свободи нас от всяких нечистых дел, да не погаснет в нас сияние благодатного света Твоего, вопиющих Ти:

Прииди, Всеблагий, и даждь нам умиление и источник слез! Прииди, и научи нас поклоняться Тебе духом и истиною. Прииди, Истино высочайшая, и уясни сомнения скудного разума. Прииди, Жизнь нестареемая, и прими нас с краткостию века земного. Прииди, Свете Вечный, и развеются призраки и страхи. Прииди, вечно иная Сила, освежи изнемогших чад Твоих! Прииди, Безконечная Радость, и забудутся невзгоды временныя.

**Прииди, Утешителю Душе Святой, и вселися в ны!**

## **Кондак 6**

Ликуй, дочь света, святая мати Сион! Украшайся великая невесто, небеси подобная, светло блистающая вселенская Церковь Христова! На Тебе почивает Дух Святой немощная врачуя, оскудевающая восполняя, мертвия оживляя и к вечной жизни приводя всех, достойно и праведно зовущих: **Аллилуиа!**

## ***Икос 6***

«В мире скорбни будете», рече Господь. Где обрящем отраду, и кто утешит нас? Душе Утешителю, Ты утоли наша печали! Ходатайствуй о нас воздыханиями неизреченными и облегчи сердца молящихся Тебе:

Прииди, сладкая Прохлада труждающихся и обремененных. Прииди, Собеседниче узников и Опора гонимых. Прииди, ущебри изнуренных нищетою и голодом. Прииди и уврачуй страсти наших душ и телес. Прииди, и посети всех жаждущих Твоего озарения. Прииди, и осмысли наша скорби надеждою вечныя радости!

**Прииди, Утешителю Душе Святой, и вселися в ны!**

## ***Кондак 7***

«На Святаго Духа хулившему, не простится ни в сем веке, ни в будущем», рече Господь. Слышаще сие страшное изречение, трепещем, да не осудимся с непослушными Тебе и богоборными. Не даждь уклоняться, Душе Святой, сердцам нашим в словеса лукавствия. Обрати от расколов, ересей и безбожия всех заблудших, и всех с Церковью первенцев Твоих сподоби во веки веков воспевати: **Аллилуиа!**

## ***Икос 7***

Егда отступи Дух Святый от Саула, тогда страх и уныние постиже его, и тьма отчаяния низверже его в преисподнюю. Тако и аз в день уныния и ожесточения моего разумею, яко удален есмь от Твоего света. Но дай мне неослабно звати Тя, души моя Ограду, дондеже свет Твой озарит мя малодушнаго:

Прииди убо, и не отвержи мене за роптание и нетерпение мое. Прииди, и умиротвори лютую бурю смятения и раздражения. Прииди, и успокой озлобленных житейскими невзгодами. Прииди, и смягчи сердца в день ожесточения и гнева. Прииди, и сокруши козни смущения и устрашения духов тьмы. Прииди, и вдохни в ны дух сокрушен, да терпением спасем души наша.

**Прииди, Утешителю Душе Святый, и вселися в ны!**

## ***Кондак 8***

Спаси ны, Отче Небесный! Мы убоги и немощны, и слепы, и наги духовно! Даруй нам злато Твое, огнем очищенное, покрый нас от срама одеждою белою, исцели помазанием Твоим очи наши. Благодать Животворящаго Твоего Духа да снидет в нечистые сосуды душ наших, и возродит нас поющих: **Аллилуиа!**

## ***Икос 8***

Яко Вавилонская башня разрушится счастье земное. Жалки все начинания человеческия. Благо мне, яко смирил мя еси, яко открыл еси мне в согрешениих и падениих моих всю слабость и ничтожество мое. Без Тебе не можем творити ничесоже, но благодатию Твоею уповаем спастися:

Прииди убо, единый мудрый Строителю жизни. Прииди, и уясни нам непостижимыя пути Твоя. Прииди, яко молния, и освети конец нашего земнаго бытия. Прииди, и благослови, всякое благое начинание наше. Прииди, и буди помощник в добрых делах. Прииди, и озари ум наш в час недоумений. Прииди, даруя дух покаяния, да отвратятся тем грядущия на мир скорби.

**Прииди, Утешителю Душе Святой, и вселися в ны!**

## ***Кондак 9***

Тако возлюби Бог, яко и Сына Своего Единороднаго дал есть, Иже от Духа Святаго и Марии Девы вочеловечився, на кресте простре зиждительныя Свои руце, Кровию же Своею весь мир от греха и смерти искупи! Темже вся тварь, свободы славы чад Божиих чая, Отцу возлюбившему, Сыну искупившему и Духу освящающему поет: **Аллилуиа!**

## **Икос 9**

Дух Животворящий, яко голубь сошедший на Христа на Иордани и на мне опочил есть при купели крещения. Но помрачися действие доброты Его от тьмы грехопадений моих. Темже, яко путник заблудшийся в лесу нощию, ожидает зари, тако и аз жажду лучей Твоих, Блаже, да не погибну до конца:

Прииди убо к запечатленному страшным именем Твоим. Прииди, и облегчи совесть мучимую, нещадно палимую. Прииди, и обнови во мне омраченный Твой образ. Прииди, и разсей греховный видения. Прииди, и научи сострадати чуждому горю. Прииди, и подвигни мя любити всякое создание Твое. Прииди, и воздаждь ми радость спасения Твоего.

**Прииди, Утешителю Душе Святой, и вселися в ны!**

## **Кондак 10**

Дух Святой возраждает в жизнь вечную, Дух Святой вдохновляет мучеников, освящает священников, венчает праведников, хлеб и вино совершает Телом и Кровию Божественными. О, глубино богатства и премудрости Божия! Даруй нам венец Твоих даров - всепрощающую вечную любовь, скорбящую за врагов, хотящую всем спастися, да озареннии ею, яко чада света, поем:  
**Аллилуиа!**

## ***Икос 10***

Кто ны отлучит от любви Божия; скорбь ли или теснота, или гонение, или глад, или нагота, или беда, или меч? Аще и всего лишимся на земли, имамы наследие неувядаемо на небеси. Но даруй нам, Господи, любити Тя не словом или языком, а истинным делом и подвигом всея жизни:

Прииди же, Душе Всесильный, и умножи нам всепобеждающую веру. Прииди, и даждь нам дерзновение молитвенное. Прииди, и согрей сердца наша, да не охладет любовь наша в сердце за преумножение беззаконий. Прииди, и не даждь нам отпасть во дни гонений и осмеяния веры. Прииди, и сохрани нас от непосильных искушений и соблазнов. Прииди, и оживи сердца наша кроплением росы Твоея. Прииди, уврачуй, освяти и возстави нас, Блаже, Твоею благодатию.

**Прииди, Утешителю Душе Святой, и вселися в ны!**

## ***Кондак 11***

Тако глаголет Господь: «Излию от Духа Моего на всяку плоть, и прорекут сынове ваша и дочери ваша, и юноши ваша видения узрят, и старцы ваши сония увидятъ». Душе всежеланный, даждь токмо едину от крупиц с трапезы избранных сынов утешения Твоего и нам умильно зовущим: **Аллилуиа!**

## ***Икос 11***

Аще и на краткое мгновение, яко блистание молнии, Ты возсияеши в тайне души, но незабвенно есть светолитие откровения Твоего, от негоже страшным и боголепным изменением преображается бренное естество. Сподоби убо, Утешителю Благий, и нас еще в земнем житии чистым сердцем узрети Тя, вопиющих Ти:

Прииди, светоподательная Молния вечности. Прииди, и озари нас невечерним сиянием. Прииди, Сокровище смиреномудрия и веселие кротких. Прииди, Вода живая и прохлади нас среди зноя страстей. Прииди, ибо вдали от Тебе нет радости и покоя. Прииди, яко с Тобою всюду Небесное Царство. Прииди, и напечатлей в душе солнцевидный лик Твой.

**Прииди, Утешителю Душе Святой, и вселися в ны!**

## ***Кондак 12***

Благодати реко неистощимая, Душе Святой, грехов разрешителю! Приими моления наша о всем мире, о верующих и неверующих, и о сынах противления: и всех приведи к вечному Царствию Святыя Троицы; да упразднится Тобою и последний враг, - смерть, и мир, возрожденный очистительным огнем, воспоеет новую песнь безсмертия: **Аллилуиа!**

## **Икос 12**

Зрю духом град Божий - Иерусалим небесный, яко невеста украшенный, солнцевидный, торжествующий. Слышу ликования праведных на трапезе Господней, и гласы Ангелов и пресветлаго Господа посреде избранных Своих, и отбеже болезнь и печаль и воздыхание. Царю Небесный, Душе Святой, седмицею даров Твоих сподоби и нас причастниками быти сия вечная радости в Бозе зовущих Ти сице:

Прииди, Блаже, и возбуди в нас жажду загробного бытия. Прииди, и затепли в душе чаяние жизни истинного века. Прииди, и открой нам радости грядущаго Царствия. Прииди, и даждь нам снегосветлую ризу чистоты. Прииди, и исполни нас блистанием Божества. Прииди, и возми нас на брак Агничий. Прииди, и сподоби в вечной славе Твоей царствовать.

**Прииди, Утешителю Душе Святой, и вселися в ны!**

## **Кондак 13**

О, светоносная пучино спасающей любви, Душе Животворящий! Согрей дыханием наития Твоего оледеневший в беззакониях род человеческий, силою непостижимых судеб Твоих ускори погибель зла, и яви вечное торжество Божественная правды. Да будет Бог всяческая и во всех: и всяко колено небесных и земных и преисподних да воспоеет: **Аллилуиа!**

*(Этот кондак читается трижды, затем снова 1-й икос и 1-й кондак.)*